



**TEZAU LITURGIC**

**29 IULIE**

**SLUJBA  
NAȘTERII  
SF. IERARH  
NICOLAE,  
ARHIEPISCOPUL  
MIRELOR LICHIEI**



**MOSCOVA, 2008**



# Мѣсяца Іулія въ 29-й день Рождество великаго святителя и чудотворца Николая [1]

## НА МАЛЫЙ ВЕЧЕРНИ

На Господи возвахъ: **стихиры на 4, гласъ 1.**

**Подобень: Небесныхъ чиновъ.**

**Н**ынѣ свѣтло прѣзднуемъ святителя и чудотворца Николая преславное рождество, отъ праведнику бо возсія намъ, отъ добляго Теофана и благочестивыя Нонны, великій свѣтильникъ святитель Христовъ, просвѣщаетъ наша сердца и помышленія. **[Дважды.]**

**Н**ынѣ, святителю Николѣе, душа твоя пребываетъ въ горнемъ Іерусалимѣ со святыми ангельскими силами и во славу праведныхъ, но свѣше, святителю, и насъ назирай, прѣзднующихъ любовію день рожденія твоего.

**Н**ынѣ отечество твое, святителю, градъ Ликія свѣтло прѣздуетъ во святѣмъ и славному рождествѣ твоёмъ, и мы съ ними купно веселящеся, вопіемъ: Ты еси, отче, похвала наша и утвержденіе.

## **Слава, гласъ 4:**

**В**сечестное твое рождество, отче Николѣе, ангеловъ множество на небеси и человѣческій

ро́дъ на землі, че́стно ублажа́еть, я́ко святи́тель  
Вы́шняго во свѣ́тѣмъ ро́ждествѣ́ твоѣ́мъ  
прона́речѣ́нь еси́; То́го моли́ о на́съ, не преста́й,  
мо́лимся, я́ко на тя́ упова́ніе полага́емъ,  
святи́телю Нико́лае.

**И ны́нѣ, [богоро́диченъ, гласъ то́йже:**

**И**зба́ви на́съ отъ ну́ждъ на́шихъ, Ма́ти Христа́  
Бо́га, ро́ждшая всѣ́хъ Творца́, да вси́ вопі́емъ Ти́:  
ра́дуйся, еди́но предста́тельство ду́шъ на́шихъ.]

**На стихо́внѣ стихи́ры, гласъ 2.**

**Подобѣ́нь:** [До́ме Евфра́вовъ.]

**Д**не́сь ны́нѣ, земноро́днии, при́имите чистоты́  
рачи́теля, Ду́ха Божѣ́ственного при́ятище,  
Ли́кіомъ сла́ву и всѣ́мъ земны́мъ удо́брѣніе.

**Стихъ:** **П**ра́ведникъ, я́ко фи́никсъ,  
[про́цвѣтѣ́тъ, я́ко ке́дръ, и́же въ Лива́нѣ,  
умно́жится].

**П**рииді́те ны́нѣ, празднолю́бцы, свѣ́тло  
торжеству́емъ въ честнѣ́мъ ро́ждествѣ́ вели́каго  
отца́ и тайнника Христо́ва.

**Стихъ:** **Н**аса́ждѣ́ни въ до́мѣ Госпо́дни, [во  
дво́рѣхъ Бо́га на́шего процвѣ́тутъ].

**П**рииді́те, соше́дшеся, съ Дави́домъ вкупѣ́  
возопі́емъ: дне́сь ро́дъ пра́выхъ благословля́ется,  
отъ пра́ведныхъ роди́телей святи́тель Вы́шняго  
на́мъ ражда́ется.



### Сла́ва, гла́сь 4:

**В**семі́рная ра́дость отъ пра́ведникъ возсія́ намъ дне́сь, рождество́ твоё, святи́телю о́тче Нико́лае, и́же премно́гія ра́ди твоея́ чистоты́ хра́мъ Бо́жій одушевле́нь яви́лся еси́ и во святи́телехъ предиве́нь познава́ешися. Того́ моли́твами, Христе́ Бо́же, ми́ръ мірови низпосли́ и душа́мъ на́шимъ ве́лю ми́лость.

### И ны́нѣ, богоро́диче́нь [гла́сь то́йже:

**И**му́ще Тя, Богоро́дице, упова́ние и предста́тельство, вра́жіихъ навѣ́тъ не убоимся, я́ко спаса́еши ду́ши на́ша.]

### Тропа́рь, гла́сь 4:

**Ч**у́дное и сла́вное рождество́ твоё, святи́телю Нико́лае, Це́рковь дне́сь правосла́вныхъ свѣ́тло пра́зднуе́тъ, и́бо стоя́ніемъ ногу́ твоёю яви́ тя Госпо́дь и произвести́ бо бы́ти свѣ́тильника и учителя́ Мү́ряномъ, ве́сь міръ обогаща́юща и просвѣ́щающа чудесы́, тѣ́мъ вопі́емъ ти: моли́ Христа́ Бо́га спастися душа́мъ на́шимъ.

### Инъ тропа́рь, гла́сь 2:

**Д**не́сь возсія́ намъ, я́ко со́лнце, торже́ство твоё, о́тче Нико́лае, и́бо въ рождествѣ́ твоёмъ дивнымъ стоя́ніемъ но́гъ твои́хъ, а́нгелы возвесели́ль еси́ и челове́ки удиви́ль еси́, проти́вныя же устраши́ль еси́. Тѣ́мже ны́нѣ и

Христо́ва Це́рковь украша́ется я́ко неvěста, и  
высо́кимъ гласомъ вопі́еть: вёсело уясни́ся моя  
добро́та прекра́сно, прииді́те, вѣ́рнии,  
возвеселі́тесь и поды́мите спасе́ніе ва́ше и  
душе́вное нетлѣ́ніе, въ бѣ́дахъ — ско́раго  
помощника, въ ско́рбехъ — посѣ́ителя, въ мо́ри  
обурева́емии — тѣ́хое приста́нище, алчу́щии —  
пита́теля, слѣ́пѣи — вождя́, ни́щии — бога́тство,  
ста́рцы — же́злъ, ю́нѣи — наказа́теля и чистотѣ́  
учите́ля, и вси́ притека́ющіи съ вѣ́рою прие́млютъ  
исцѣ́леніе душа́мъ и тѣ́ломъ.

### **Сла́ва, и ны́нѣ, богоро́диченъ:**

**В**ся́, па́че смы́сла, вся́ пресла́вная Твоя́,  
Богоро́дице, та́инства, чистотѣ́ запеча́танной и  
дѣ́вству храни́му, Ма́ти позна́лася еси́ нелóжна,  
Бо́га ро́ждши Истиннаго. Того́ моли́ спасті́ся  
душа́мъ на́шимъ.

### **НА ВЕЛИЦѢЙ ВЕЧЕРНИ**

[**Б**лаже́нъ му́жъ..., **1-й антифо́нъ. На Го́споди**  
воззва́хъ:] **стихи́ры [на 8], гласъ 2. Подóбенъ:**  
**К**іими похва́льными вѣ́нцы.

**К**іими похва́льными вѣ́нцы, вѣ́нчае́мъ  
святите́ля въ чуде́снѣмъ рождествѣ́ его́? Плотію́  
бо въ Мѣ́рѣхъ су́ща, духо́вно же всѣ́хъ  
достиза́юща, и всю́ вселенну́ю озаря́юща, иже  
чи́стъ того́ любящихъ, всѣ́мъ предста́теля и

засту́пника, и всѣмъ скорбнымъ утѣшителя, благочестія столпа, вѣрнымъ поборника, его́же ра́ди шата́нія враговъ Христо́съ низложи, имѣяй ве́лю мѣло́сть. **[Трижды.]**

**К**іими пѣсньми похва́лимъ святи́теля въ честнѣмъ рождествѣ́ его́? Нечестію сопроти́воборца́ и благочестію поборника, Це́ркви первостоя́теля, вели́каго за́щитника и учителя, и те́плаго пособника, злосла́вныя посрамля́юща, потре́бителя Аріе́ва, его́же ра́ди сего́ шата́ніе Христо́съ низложи, имѣяй ве́лю мѣло́сть. **[Трижды.]**

**К**іими духо́вными пѣньми и пѣсньми восхва́лимъ святи́теля во сла́внѣмъ торже́ствѣ́ его́? Далече́ бо су́щая провѣ́дяща и отстоя́щая я́ко бли́зь су́ща, и въ рождествѣ́ своѣмъ стоя́ніе честныхъ но́гъ проро́честву́юща не́ложно, е́же все́й вселѣ́ннѣй хотя́щи бы́ти назирате́ля, и оби́димымъ изба́вителя, ца́ремъ окормите́ля, и связа́ннымъ разрѣ́шителя, и отъ непра́ведныя сме́рти свобо́дителя и всѣмъ да́рующа вѣрнымъ ве́лю мѣло́сть. **[Дважды.]**

### **Сла́ва, гла́съ 6:**

**С**вяти́телемъ удо́брѣніе и отце́мъ сла́ву, исто́чника чуде́съ неисчерпа́емаго и вѣрнымъ засту́пника вели́каго, соше́дшеся, о празднолю́бцы, цвѣ́ты добродѣ́телей взѣ́мше,

пѣсненными похвалами воспоемъ, глаголюще: ра́дуйся, въ Мѣ́рѣхъ Ли́кійскихъ ро́ждѣнный и все́му мѣ́ру во́жде́лѣнный, вѣ́рнымъ храни́телю и на́мѣстниче че́стный и сто́лпе непоколебѣ́мый; ра́дуйся, свѣ́тильниче всесвѣ́тлый, и́же мѣ́рскія концы́ просвѣ́щая чуде́сы; ра́дуйся, печа́льнымъ божѣ́ственное ра́дование и оби́димымъ те́плый побо́рниче. И ны́нѣ, всеблаже́нне Нико́лае, не преста́й моля́ся Христу́ Бо́гу о чту́щихъ вѣ́рою и лю́бовію прѣ́сно ра́достную и всепра́зднественную па́мять ро́ждества́ твоего́.

**И ны́нѣ, [богоро́диченъ, гла́съ то́йже]:**

**К**то Тебѣ́ не ублажи́тъ, [Пресвята́я Дѣ́во? Кто́ ли не воспое́тъ Твоего́ Пречи́стаго Ро́ждества́? Безлѣ́тно бо о́тъ Отца́ возсія́вый Сы́нъ Единоро́дный, То́йже о́тъ Тебе́, Чи́стыя, про́йде, неизрече́нно вопло́щся: естество́мъ Бо́гъ Сы́й и естество́мъ бы́въ Человѣ́къ на́съ ра́ди; не во дво́ю ли́цу раздѣ́ляемый, но во дво́ю естеству́ несли́тно познава́емый. Того́ моли́, Чи́стая Всеблаже́нная, поми́ловатися душа́мъ на́шимъ].

**[Вхо́дъ. Прокі́менъ дне́.]**

**Чте́нія три́ святите́льская.**

**Притчей́ чте́ние.**

**Па́мь** пра́веднаго съ похвала́ми, и благослове́ние Госпо́дне на главѣ́ его́. Блаже́нъ челове́къ, и́же обрѣ́те премудро́сть, и сме́ртенъ,



и́же увѣ́дѣ́ ра́зумъ. Лу́чше бо сію́ купова́ти, не́жели зла́та и серебра́ сокрови́ща. Честнѣ́йшая же е́сть ка́меній многоцѣ́нныхъ, все́ же честное́ недостойно́ ея́ е́сть. Долгота́ бо днѣ́й и лѣ́та живота́ въ десни́цѣ ея́, въ шу́йцѣ́ же ея́ бога́тство и сла́ва. Отъ у́стъ ея́ исхо́дитъ пра́вда, зако́нъ же и ми́лость на язы́цѣ́ но́ситъ. Послу́шайте у́бо мене́, о ча́да, честна́я бо реку́, и блаже́нь челове́къ, и́же пути́ моя́ сохра́нить: исхо́ди бо мой — исхо́ди живота́, и уготовля́ется хотѣ́ніе отъ Го́спода. Сего́ ра́ди молю́ ва́съ и предлага́ю мой гла́съ сыновомъ́ челове́ческимъ. Я́ко азъ, премудро́сть, устро́ихъ совѣ́тъ, и ра́зумъ и смы́слъ азъ призва́хъ. Мой совѣ́тъ и утвержде́ніе, мой ра́зумъ, моя́ же крѣ́пость. Азъ мене́ любя́щія люблю́, и́щущи́ же мене́ обря́щутъ благода́ть. Разу́мѣ́йте у́бо, незло́бивіи, кова́рство, ненака́заніи́ же, прилага́йте сердца́. Послу́шайте мене́ и па́ки, честна́я бо реку́, и отве́рзу отъ усте́нь пра́вая, я́ко и́стинѣ́ поучи́тся горта́нь мой, ме́рзки же пре́до мною́ устны́ лжи́выя. Съ пра́вдою вси́ глаго́лы у́стъ моихъ́, ничто́же въ нихъ́ стропотно́, ниже́ развра́щенно́. Вся́ пра́ва су́ть разу́мѣва́ющимъ и про́ста обрѣ́тающимъ ра́зумъ. Науча́ю бо ва́съ и́стинѣ́, да бу́детъ о Го́сподѣ́ наде́жда ва́ша, и испо́лните́ся Ду́ха.

## Притчей чтёніе.

Уста́ праведнаго ка́плють премудро́сть, язы́къ же неправеднаго поги́бнетъ. Устнѣ́ мужей праведныхъ ка́плють благода́ти, уста́ же нечестивыхъ развраща́ются. Мѣрила лѣстивая ме́рзость предъ Го́сподемъ, вѣ́сь же праведный прі́яте́нь Ему́. Идѣ́же а́ще вни́детъ досаждѣ́ніе, та́мо и безче́стіе, уста́ же смире́нныхъ поуча́ются премудро́сти. Соверше́ніе пра́выхъ наста́вить ихъ, и поползнове́ніе отрица́ющихся упасѣ́тъ ихъ. Не по́льзуютъ имѣ́нія въ де́нь я́рости, пра́вда же изба́вить отъ сме́рти. Умеръ праведный, оста́ви раская́ніе, на́ручна́ же быва́етъ и посмѣ́тельная нечестивыхъ па́губа. Пра́вда непоро́чнаго исправля́етъ пу́ти, въ нече́стіе же па́даетъ неправда. Пра́вда мужей пра́выхъ изба́вить ихъ, безсовѣ́стіемъ же плѣ́няются беззако́ннии. Сконча́вшуся му́жу праведну, не поги́бнетъ наде́жда, похва́ла же нечестивыхъ поги́бнетъ. Пра́ведникъ отъ ло́ва уби́гнетъ, въ него́же мѣ́сто преда́ется нечестивый. Во устѣ́хъ нечестивыхъ сѣ́тъ гра́жданомъ, чу́ство же праведныхъ благопоспѣ́шное. Во бла́гихъ праведныхъ испра́вится гра́дъ, и въ поги́бели нечестивыхъ ра́дованіе. Во благослове́нии пра́выхъ возвы́сится гра́дъ, усты́ же нечестивыхъ раскопа́ется.

Ругается граждано́мъ лише́нный ра́зума, му́жъ же му́дрый безмо́лвіе во́дитъ.

### **Премудрости Соломо́ни чтѣніе.**

**П**раведникъ, аще постигнетъ скончатися, въ поко́и бу́детъ. Ста́рость бо честна́ не многолѣтна, ниже́ въ числѣ́ лѣтъ исчита́ется. Сѣди́на же е́сть му́дрость чело́вѣкомъ, и во́зрастъ ста́рости — житі́е несквѣ́рное. Благоуго́денъ Бо́гови бы́въ, возлю́бленъ бы́сть, и живы́й посре́дѣ грѣ́шникъ, преста́вленъ бы́сть. Восхи́щенъ бы́сть, да не зло́ба измѣ́нитъ ра́зума егѡ́ или́ лѣ́сть прельсти́тъ ду́шу егѡ́. Раче́ніе бо зло́бы помрача́етъ до́брая и паре́ніе по́хоти, премѣ́няетъ у́мъ незло́бивъ. Сконча́вся вма́лѣ, испо́лни лѣ́та до́лга, уго́дна бо бѣ́ Господеви ду́ша егѡ́, сего́ ра́ди потща́ся отъ сре́ды лука́вствія. Лю́діе же ви́дѣвше и не разуме́вше, ниже́ поло́жше въ помышле́ніи тако́вое, я́ко благода́ть и ми́лость въ преподо́бныхъ Егѡ́ и посѣ́щеніе во избра́нныхъ Егѡ́.

### **На литіи стихи́ры, гла́съ 2:**

**О**тче Нико́лае, аще и Мѹ́рская страна́ израсти́тя, но мі́ръ весь, иже тобо́ю просвѣ́щенный мѹ́рными благоуха́ніи и чуде́съ мно́жествомъ, взыва́етъ похва́льными пѣ́сньми. И спаса́иися тобо́ю неосу́ждѣни, съ су́щими въ Мѹ́рѣхъ, и мы́ пою́ще вопі́емъ: моли́ спастися ду́шамъ на́шимъ.

### Гласъ 4:

**О**тче Никóлае, зако́на судьба́ми, я́ко са́дъ при вода́хъ насажде́нь бы́сть и въ до́мѣ Бóжіи пресла́вно процвѣ́ль еси́, и всѣ́хъ вѣ́рныхъ чудесы́ предивны́ми возвесели́ль еси́, тѣ́мже и ны́нѣ при́иди, о́тче, посре́дѣ на́съ невидимо и озари́ на́съ отъ Бо́га да́нною ти благода́тію во свѣ́тлѣмъ се́мъ торже́ствѣ, въ честнѣ́мъ твоѣ́мъ рождествѣ́, богоно́се Никóлае.

### Гласъ 8:

**Д**облестей твои́хъ, преподо́бне о́тче, плоды́ просвѣ́тилъ еси́ вѣ́рныхъ сердца́ чудесны́ми блиста́ніи. Ктó бо слы́ша о се́мъ не удиви́тся, я́ко во святѣ́мъ рождествѣ́ твоѣ́мъ стоя́ніемъ но́гъ твои́хъ предиве́нь и непрекло́ненъ яви́лся еси́, досточуд́не Никóлае? Тѣ́мже и на́съ, пою́щихъ и хва́лящихъ тя, при́сно изба́ви отъ вра́гъ ви́димыхъ и невидимыхъ твои́ми къ Бо́гу моли́твами и спаси́ ду́ши на́ша.

**Н**а хвалу́ поте́клъ еси́ Госпо́дню, Никóлае, во вре́меннѣй жи́зни, и То́й тя просла́ви на небеснѣ́й истиннѣ́й жи́зни. Тѣ́мже дерзнове́ніе стяжа́въ къ Нему́, моли́ спасти́ ду́ши на́ша.

### Сла́ва, гласъ 6:

**Д**не́сь, вѣ́рныхъ собо́ри, соше́дшеся, воспоѣ́мъ вку́пѣ́ согласо́ предивна́го отца́, святи́теля Николая́, торже́ство, зача́тіе бо его́ че́стно, и

рождество́ его́ свято, и во младе́нчествѣ́ его́ дивная́ всѣ́мъ яви́шася, тѣ́мже во́пиємъ ему́: сосу́де святои́збра́нный, сто́лпе и утве́ржде́ніе Це́ркви, Ца́рствію наслѣ́дниче, не премолчи́, во́пія за ны́ ко Го́споду.

**И ны́нѣ, богоро́диченъ, [гласъ то́йже]:**

**Т**воре́цъ и Изба́витель мо́й, [Пречи́стая, Христо́съ Госпо́дь, изъ Твои́хъ ложе́снъ проше́дъ, въ мя́ оболкѣ́йся, пе́рвыя кля́твы Ада́ма свобо́ди. Тѣ́мже Ти́, Всечи́стая, я́ко Бо́жіи Ма́тери же и Дѣ́вѣ́, вои́стинну во́пиємъ немол́чно: ра́дуйся а́нгельски, ра́дуйся, Влады́чице, предста́тельство, и покрове́, и спасе́ніе ду́шъ наши́хъ].

**На стихо́внѣ́ стихи́ры, гласъ 5. Подо́бенъ:**

**Ра́дуйся.**

**Р**а́дуйся, яви́выйся денни́це пресвѣ́тлая, пребезнача́льнаго свѣ́та Влады́ки. Ра́дуйся, заре́ тайнаго́ свѣ́та, іе́ра́рше Христо́въ Нико́лае, предвари́ и подви́гни пречи́стыя твоя́ моли́твы о́ насъ ко Го́споду, пра́зднующихъ вѣ́рою па́мять рождества́ твоего́, во е́же изба́вити насъ отъ вся́кія напа́сти и лю́тыя наша́ болѣ́зни исцѣ́лити. Отче, тебе́ бо засту́пника і́мамы и уми́льно съ вѣ́рою во́пиємъ ти́: моли́ся о́ насъ Христу́ Бо́гу дарова́ти намъ ве́лію ми́лость.



**Стихъ:** П<sup>р</sup>аведникъ, я<sup>к</sup>о ф<sup>и</sup>никсѣ, процвѣтѣтъ, [я<sup>к</sup>о кѣдръ, иже въ Ливанѣ, умножится].

**Р**адуйся, главо преосвященная и Богу вождельная, и отъ праведныхъ родителей, якоже вторый Самуиль, въ даръ Богу возложенный, и явился еси честное добродѣтелей жилище, бодренное правило непорочнаго священства пастырю добрый и пресвѣтлый, превеликій свѣтильниче, иже побѣдоподобное носяи имя, требующихъ милостивно прошенія исполняеши, приклоняся къ молитвамъ молящихся. Граде спасенный и одушевленный, притичущимъ къ тебѣ избавителю готовѣйшей, всѣмъ вѣрою поющимъ твое преславное торжество, даруй намъ велию милость.

**Стихъ:** Насаждени въ дому Господни, [во дворѣхъ Бога нашего процвѣтутъ].

**Р**адуйся, честный грозде зрѣлаго плода, отъ праведнику нынѣ явился еси яко пресвѣтлая заря, и всѣмъ намъ предивенъ познаваешися, отче Николае, честный уме, Троицы честный сосуде, столпе церковный, вѣрнымъ утѣшеніе, побѣждаемымъ помощь. И нынѣ, во свѣтлѣмъ торжествѣ рождества твоего, богопріятными твоими молитвами, разори напастей и скорбей нашихъ тму, святителю Николае. Ты бо еси

и́стинный и любѣ́зныи па́стырь и о́тець на́шъ, и мы́ о́вцы па́жити твоея́ и въ по́мощь тебѣ́ призыва́емъ, да́руй намъ вѣ́лю ми́лость.

### **Сла́ва, гла́съ 2:**

**П**риидите, христоименитыхъ людей соборе и всѣхъ вѣрныхъ сословіе, днесь нынѣ въ лицѣ ставше и свѣтлымъ гла́сомъ возопіемъ: блаженъ еси́ Теофа́не, я́ко такову́ о́троку бы́въ роди́тель, хотя́щаго роди́ти сло́вомъ уче́нія мно́гихъ ко спасе́нію; блаже́нна ло́жесна́ твоя́, Но́нно, и́маже носи́ла еси́, и кра́сна сосца́ твоя́, и́маже воздо́йла еси́ хотя́щаго напитати́ душе́тѣ́льнымъ гла́домъ та́ющія; блаже́нно отче́ство ва́ше, гра́дъ Ли́кія, и вся́ окрѣ́стная е́го. Но помо́лимся ва́ма, блаже́нная, е́же мо́лити е́го о на́съ, да испро́ситъ у Христа́ ми́ра мі́рови и ду́шамъ на́шимъ вѣ́лю ми́лость.

### **И ны́нѣ, [богородиче́нь,] гла́съ то́йже:**

**О**, чудесе́ но́ваго, [всѣхъ дре́внихъ чуде́съ! Кто́ бо позна́ Ма́терь, безъ му́жа ро́ждшую и на ру́ку нося́щую всю́ тва́рь Соде́ржащаго? Бо́жіе е́сть изволе́ние Ро́ждшееся. Е́гоже́ я́ко Младе́нца, Пре́чистая, Тво́йма ру́кама носи́вшая, и ма́тернее дерзнове́ние къ Не́му иму́щая, не преста́й моля́щи о чту́щихъ Тя́, уще́дрити и спасти́ ду́ши на́ша].

**[На благословѣніи хлѣбовъ: Тропарь святаго, дважды [писанъ на малѣй вечерни] и Богородице Дѣво.., единожды.]**

## **НА УТРЕНИ**

**На Богъ Господь: Тропарь святаго, [дважды].  
Слава и нынѣ, богородиченъ воскресный.  
По 1-мъ стихословіи съдаленъ, гласъ 1.  
Подобенъ: Гробъ Твой.**

**Въ** Мѣрѣхъ рождѣся, святителю, мѣромъ разумно духовнымъ явися помазанъ, отче Николаете, тѣмже мѣры чудесъ твоихъ мѣръ благоухаль еси, мѣро приснотекущее проливая, иже мѣрными твоими благоухаемыми чудесы почитающихъ торжество твое и насъ, рабъ твоихъ, обогати. **[Дважды.]**

### **Слава и нынѣ, богородиченъ:**

**Всѣхъ** Творца Бога же и Содѣтеля, Всенепорочная Чистая, Духомъ Божественнымъ въ ложе снахъ зачѣнши и тлѣнія кромѣ родила еси, Егже славяще, Тя воспѣваемъ, Дѣво, яко Палату Царя всѣхъ и міру Заступленіе.

### **По 2-мъ стихословіи съдаленъ, гласъ 8.**

#### **Подобенъ: Премудрости.**

**Источникъ** чудесъ отъ Бога явился еси, мудре Николаете, тѣмже, отче, въ рождествѣ твоѣмъ

дивенъ явлься, всѣмъ бо вѣрнымъ источаеши спасенныя воды, отъ Бога благодать приѣмъ, тѣмже дерзновѣніе имѣя къ Немѹ, моли о чтущихъ вѣрою и любовію память рождества твоего, всеблаженне Никѡлае. **[Дважды.]**

**Слава, и нынѣ, богородиченъ:**

**Въ** калѣ грѣховный впадохъ и нѣсть мнѣ постоянія, люте погрузи мя буря согрѣшеній. Но, яко рождыши Слѡва, еди́наго Человѣколюбца, на мя, раба Твоего, призри и избави всякаго грѣха, и страстей душетѣльных, и всякаго озлобленія лстиваго врага, Богородице Неискусомужная. Моли Христа Бога грѣховъ оставленіе подати ми, Тя бо имамъ надежду, рабъ Твой.

**По поліелѣи сѣдаленъ, гласъ 5:**

**Нынѣ,** ѡтче святителю Никѡлае, ѡтѣчество твое, градъ Ликія, свѣтло радуется, и вся вселенная день рожденія твоего чѣстно празднуетъ. Тѣмже и мы днесъ во храмъ твоѣмъ, сошедшеся вкупѣ съ ними, похвальная приносимъ ти, глаголюще: радуйся, ѡтче Никѡлае, всѣхъ покрове и заступленіе. **[Дважды.]**

**Слава, и нынѣ, богородиченъ:**

**Неискусобрачная** Невѣсто, Приснодѣво, со святители непрестанно восхваляемъ Тя, яко Тобою намъ величія сотвори Сынъ Твой и Богъ

Превѣ́чный отъ Отца́, Иже въ ло́жесна́хъ Твои́хъ  
вмѣ́стится изво́ливый, да отъ лѣ́сти свободи́тъ  
ро́дъ на́шъ.

**Степе́нна, 1-й антифо́нь 4-го гла́са.**  
**Прокиме́нь, [гла́сь 4]:** Пра́ведникъ, я́ко  
фи́никсъ, процвѣ́тѣтъ,\* я́ко ке́дръ, и́же въ  
Лива́нѣ, умно́жится. **Сти́хъ:** Наса́ждени въ до́мѣ  
Госпо́дни, [во дво́рѣхъ Бо́га на́шего  
процвѣ́туютъ]. **Ева́нгеліе Матѳе́я, зача́ло 11:** Вы  
есте́ свѣ́тъ мі́ра. Не мо́жетъ гра́дъ укры́тися,  
верху́ горы́ стоя...

**По 50 псалмѣ́ стихи́ра, гла́сь 6:**

Дне́сь, вѣ́рныхъ собо́ри, соше́дшеся, [воспое́мъ  
вкупѣ́ со́гласно предивна́го отца́, святи́теля  
Никола́я, торже́ство, зача́тіе бо е́го́ че́стно, и  
рожде́ство е́го́ свято, и во младе́нчествѣ́ е́го́  
дѣ́вная всѣ́мъ яви́шася, тѣ́мже вопіе́мъ е́му:  
сосу́де святоизбра́нный, сто́лпе и утвержде́ніе  
Цѣ́ркви, Ца́рствію наслѣ́днице, не премолчи́,  
вопи́я за ны́ ко Го́споду].

**Кано́нь Пресвяты́й Богоро́дицѣ́ со ирмосо́мъ  
на 6, [и] кано́нь вели́кому святи́телю и  
вселенскому чудотво́рцу Никола́ю [на 8],  
гла́сь 3 [3].**



## ПѢСНЬ 1.

**Ирмосъ:** Дивно, славно творяй чудеса Ты еси, Боже, бездну оземленивый, и колесницы потопивый, и люди спасый, поющія Тебѣ, яко Царю нашему и Богу.

Дивенъ и славенъ еси, Господи, творяй чудеса, раздѣливый море, и воду изъ камене источивый жаждущимъ людямъ. Напой убо, Блаже, и мене росю Твоея благодати, да возмогу воспѣти угодника Твоего преславное рождество.

Дивное и славное рождество твоё, святе Николаете, отъ любви душевныя хочу похвалити, но недоумѣніемъ содержишь, боюся трепещу, зане вѣмъ, яко не красна похвала во устѣхъ грѣшниковъ. Но обаче дерзая на благоутробіе твоё, славаю святое твоё рождество.

Дивна воистину и славна, святителю, пѣмь рождества твоего, яко звѣзда утренняя посреди облакъ, и яко солнце сія на Церковь Вышняго, и яко дуга на облацѣхъ славы, тако сіяетъ хвала твоя на тверди церковнѣй, отче Николаете.

Дивнаго и преславнаго святителя на преславное рождество, христоименити, стѣкшеся, усердно соберитесь и славу Господеви воздадите, яко дарова намъ такова пастыря и учителя нелѣстна, и путеводителя, и отъ бѣдъ свободителя, еретикомъ же посрамителя.

**Богородичень:** Дівна и преестественна тайна рождства Твоего, Богородице! Кій бо слухъ слыша не удивится богорождению Твоему, яко во утробѣ Своей Создателя всѣхъ нетѣсно вмѣстила еси, и паки Дѣва пребыла еси?

### Пѣснь 3.

**Ирмосъ:** *Неплѣдная душе и безчадная, стяжи плодъ благославный, веселящися, возопій: утвердихся Тобою, Боже, нѣсть святъ, нѣсть праведенъ, паче Тебе, Господи.*

**Неплѣдну** имамъ душу азъ окаянный, како ты могу похвалити, святителю? Войстину ты, отче, плодъ благохвальный, душу мою плодоносну, покажи, да возмогу воспѣти святое твое рождество.

**Неплѣдна** быста родителя твоя по рождествѣ твоємъ, святителю Никѣлае. Естеству убо повѣдающе, яко не могутъ другаго такова родити, добродѣтелями же яко Авраамъ плѣдна и вѣрна быста, того ради и мзду о вѣрѣ своей отъ Бога тебе пріяста.

**Неплѣдныхъ** чреслъ честное прозябѣние, святителю, слыша, кто не удивится, рождшуся бо тебѣ, святе? Войстину дивная о тебѣ яви Господь: трѣмъ бо часомъ неуклонно тебѣ стоящу на земли, идѣже хотяше омытиса, чудне Никѣлае.

**Богородиченъ:** Непо́дрыхъ ло́жеснъ  
рождѣніе, Пресвятая Влады́чице, но ро́ждыши  
на́мъ Христа́, Плода́ Безсмер́тнаго, пита́ющаго  
всяко создáніе и смотря́щаго всю́ тва́рь,  
Богороди́тельнице.

**Съда́ленъ по 3-й пѣсни, гла́съ 5:**

**О**, блаже́нная версто́ и благослове́нное  
супру́жество прекра́снаго душе́ю Теофа́на и  
боголю́бвыя Но́нны! Божѣ́ственнымъ бо  
жела́ніемъ совоку́плени бы́ста, и израсти́вша  
на́мъ прекра́снаго пло́да, чу́днаго Никола́я, не  
то́кмо бо́ яко цвѣ́тъ шипка́, или́ крѣ́на при  
исхо́жденіи воды́, или́ сте́бло Лива́ново во дни́  
жа́твы, но и́стиннаго пло́да рѣ́ку, отца́ си́рымъ и  
вдови́цамъ засту́пника, бога́тство ни́щимъ и  
боля́щимъ здравіе́ и утѣ́шеніе, и су́щимъ въ  
бога́тствѣ́ окормле́ние, ста́рости подпо́рь и  
юности́ обуча́теля, благоче́стія окорми́теля,  
еретико́мъ же и бѣ́сомъ губи́теля. Къ нему́же мы́  
ны́нѣ возо́піемъ: о́тче святи́телю Нико́лае, моли́  
спасти́ся пою́щимъ тя. **[Два́жды.]**

**Сла́ва, и ны́нѣ, богороди́ченъ:**

**Б**лаже́нна ло́жесна́ твоя́, Богороди́тельнице  
Дѣ́во, яко ши́рши небесе́ явля́шася, сло́вомъ бо  
Составля́шаго тва́рь во утробѣ́ Свое́й безсѣ́менно  
имѣ́ла еси́, и во объ́ятіихъ Свои́хъ нетру́дно  
носи́ла еси́, тѣ́мъ мо́лимъ Тя́, Всеблаже́нная, е́же

мо́лити отъ Тебе́ ро́ждѣннаго Христа́, Бо́га на́шего, во́ еже спасти́ся пою́щимъ Тя́.

#### **Пѣснь 4.**

**Ирмо́съ:** *Покры́ла е́сть небеса́ добродѣтель Твоя́, Христѣ́, изъ Киво́та бо проше́дъ святы́ни, Твоя́ Нетлѣ́нная Ма́тере, въ хра́мъ Сла́вы Твоя́ яви́лся еси́, я́ко Младѣ́нецъ руконо́симъ, и испо́лнишася вся́ Твоего́ хвале́нія.*

**Покры́ла е́сть** я́ко о́блакъ лю́бы твоя́ и благода́ть твоя́, ю́же има́ши отъ Бо́га, святи́телю Нико́лае, всѣ́хъ призы́вающихъ и́мя твоѣ́ свято́е, всю́ду бо неоску́дно подава́еши и коего́ждо проше́нія испо́няеши. Прии́ди и ны́нѣ посреди́ на́съ невидимо́ и посѣ́ти на́съ, озло́бленныхъ грѣ́хми, лю́бовію пра́зднующихъ пречестно́е твоѣ́ ро́ждество́.

**Пра́зднуется** и украша́ется ро́ждество́мъ твои́мъ, святи́телю, я́ко моні́сты Це́рковь Христо́ва, и невѣ́стски свѣ́тло одѣ́вается и красу́ется, весе́ляся и вопі́я радостно́, глаго́ля: прии́дите и ви́дите жела́емаго мно́ю небѣснаго гра́ждани́на и служи́теля Христо́ва, дне́сь ро́ждшася отъ благовѣ́рну роди́телю.

**Па́мь** ро́ждства́ твоего́, о́тче святи́телю, всѣ́мъ чело́вѣкомъ бы́сть весе́ліе. Покры́й на́съ, о́тче всече́стне, призы́вающихъ тя́ съ вѣ́рою и

празднующихъ чѣстно торжество праздника твоего, святителю Николѣе.

**П**охваляему бо праведнику возвеселятся людѣе, якоже рече писаніе. Днесь нынѣ мы, грѣшніи, въ рождествѣ твоѣмъ, отче Николѣе, радуемся и веселимся духовнѣ, Христа славяще, иже тебѣ таковую благодать даровавшаго, яко Того хваленія исполнѣ земля.

**Богородиченъ:** Пресвятая Богоневѣсто, рождающая Христа, Правителя и Содѣтеля всѣмъ, немощствующую душу мою исцѣли и настави мя на дѣянія благая, да всегда славлю Тя Препоблагословенную.

### **Пѣснь 5.**

**Ирмосъ:** *На земли Невидимый явился еси и человекѡмъ волею сожилъ еси, Непостижимый, и, къ Тебѣ утренююще, воспѣваемъ Тя, Человѣколюбче.*

**Н**а земли, отче святителю, явился вѣрнымъ твоѣ святое рождество, войстину любезное торжество, якоже бо ливанъ въ кадильницѣ или яко маслина износящи плодъ, тако намъ память рождества твоего, отче милосерде Николѣе.

**Н**а земли днесь нынѣ, святителю, познанъ бысть, и яко отъ Бога познанъ былъ еси: прослави бо тя Господь въ рождествѣ твоѣмъ,



и́бо стоя́нїемъ честны́хъ но́гъ твои́хъ, явля́я  
хотя́щее бы́ти на тебѣ́ дарова́нїе.

**На** земли́ ны́нѣ́ Цѣ́рковь правосла́вныхъ  
весели́тся, святи́телю Нико́лае, и лику́еть съ  
ча́ды свои́ми въ па́мяти рождества́ твоего́,  
милосѣ́рде, и, вопі́я, глаго́летъ: уясни́ся ны́нѣ́  
добро́та прекра́сно и нико́гда же угасне́тъ.

**Богородиченъ:** На зе́млю во чре́во Твое́,  
Чи́стая, я́ко до́ждь на руно́ сні́де Госпо́дь и Бо́гъ  
на́шъ, и отъ Твои́хъ пречи́стыхъ дѣ́ви́ческихъ  
кровей́ плоть́ пріе́мъ и чудодѣ́йствова, и  
пострада́, и взы́де на небеса́, съ Собо́ю  
возвы́шая пра́отца.

## Пѣ́снь 6.

**Ирмо́съ:** Глуби́на страсте́й воста́ на мя́ и  
бу́ря проти́вныхъ вѣ́тровъ, но́, предвари́въ, мя́  
Ты́ спаси́, Спа́се, и изба́ви отъ тли́, я́ко спа́слъ  
еси́ отъ звѣ́ря проро́ка.

Глуби́на страсте́й воста́ на ны́ и бу́ря  
проти́вныхъ вѣ́тровъ, но́, предвари́въ на́съ, отче́  
святи́телю, и разори́ сопроти́волежа́щїй на на́съ  
совѣ́тъ лука́ваго, и лука́выхъ челове́къ  
стре́мленїя, хва́лящихся о зло́бѣ́ свое́й, спаси́ ны́  
отъ ни́хъ, милосѣ́рде Николае́.

Глуби́нѣ́ бога́тства Бо́жія диві́тися су́ть  
до́лжно, дѣ́ла же Бо́жіи сла́вити зѣ́ло е́сть лѣ́по,  
па́мяти же святи́хъ чті́ти велми́ е́сть поле́зно.

Почти́мъ у́бо и мы́, бра́тіе, и возлю́бимъ возлю́бленнаго Бо́гомъ святи́теля Нико́лая, ка́ко во святи́мъ младе́нствѣ егѡ дивна́я о не́мъ показа́ Бо́гъ. Пита́ше бо ся́, но не та́ко, я́коже обы́чай дѣ́темъ: въ сре́ду же и пято́къ еди́ною каса́шеся, и то́ къ ве́черу, отъ лѣ́ваго же сосца́ отню́дъ не сса́ше, прозна́менуя десно́е житі́я егѡ́.

**Г**лубино́ю му́дрости помышля́я о всѣ́хъ Госпо́дь, прѣ́жде противныхъ вѣ́тровъ ти́шину уготовля́етъ, на Арі́евъ у́бо плѣ́вель о́гнь вжигаетъ, сего́ дивна́го рѣ́ку и пресла́внаго святи́теля Нико́лая рождество́ явля́етъ, по рече́нному отъ апо́стола Па́вла: егѡ́же предувѣ́де Бо́гъ, сего́ и предъизбра́, и оправда́, и просла́ви.

**Богоро́дичень:** **Г**луби́нѣ та́инства богоро́ждѣнія Твоегѡ́, кто́ не удиви́тся, Пресвята́я Дѣ́во, Влады́чице? Вѣ́ковъ бо Творе́цъ всели́ся въ Тя́ и плоть отъ Тебе́ прі́ймъ у́мну и словесну́, вся́ челове́ки обожи́.

**Конда́къ, гла́сь 3 [4].**

**Подобѣнь:** Въ Мѹ́рѣхъ, свя́те.

**Въ** Мѹ́рѣхъ ро́ждься, свя́те Нико́лае, отъ благо́родна ко́рене, я́ко благопло́дна вѣ́твь прозяблѣ́ еси́, испо́лнь бо бы́хъ божѣ́ственныхъ даро́въ, я́ко со́лнце зар́ями ве́сь мі́ръ чуде́сы просвѣ́тилъ еси́, сего́ ра́ди прославля́емъ тя́, я́ко учени́ка и тайнника́ Бо́жія благода́ти.

### Инъ кондакъ, гласъ 3:

**Я**ко звѣзда пресвѣтлая просіялъ еси, блаженне Никѡлае: посреди Ликіи града отъ праведнику роди́лся еси, ѡтче, и въ честнѣмъ рождествѣ твоѣмъ чудна и славна тя показа Господь, и во святѣмъ младенствѣ твоѣмъ дивная явлена бы́ша о тебѣ. Троицу бо проповѣдалъ еси трѣхъ часѡвъ стояніемъ честныхъ ногъ твоихъ на земли въ часъ рождѣнія твоего; и отъ сосца деснаго пита́шеся, отъ лѣваго же ника́коже; въ сре́ду же и въ пято́къ еди́ною, и то́ во вре́мя ве́чернее, и оттого́, ѡтче, позна́нь бы́лъ еси воздержанія нелѣстное правило, и яко имаши бы́ти ве́лій тайнникъ Божія благода́ти.

### Икосъ:

**П**риидите ны́нѣ съ на́ми, бра́тіе, и купно духовнѣ́ возвесели́мся во святѣмъ торжествѣ́ богоно́снаго отца́ на́шего святителя Николáя, и просла́вимъ пресла́вно ро́ждшагося, и отъ утробы́ освященнаго, и Божѣ́ственного Духа при́имшаго, и Святую́ Троицу въ часъ рождѣ́нія своего́ стояніемъ ногъ своихъ проповѣ́давшего, и всѣ́хъ челове́къ уди́вльшаго, и, хва́ляще свято́е и чудное рождество́ его́, любѡвію́ и правостію́ сердечною́ благодарная къ нему́ си́це рце́мъ: раду́йся, отъ ма́тернихъ ло́жеснѣ́ Бо́гу возложе́нная и отъ Него́ усво́енная и освяще́нная главо́, сокруши́вый прокля́тому

сатанѣ́ главу́; раду́йся, предѣ́избра́нный и освяще́нный сосу́де и Бо́гу возложе́нный и возлю́бленный; раду́йся, царѣ́мъ право́вѣрнымъ по́моще и окормле́ние, и на враги́ побѣ́да и одолѣ́ние, и правосла́вию утвержде́ние; раду́йся, въ Ду́ха Свята́го облече́нный и на благоде́яние благочесті́вымъ пода́нный; раду́йся, нечесті́выхъ потреби́телю и на страхъ ихъ явле́нный; раду́йся, бѣ́сомъ прогони́телю и ерети́комъ обли́чителю; раду́йся, яко во святѣ́мъ рождествѣ́ твоѣ́мъ диве́нь всѣ́мъ позна́нный, яко има́ши бы́ти вели́кій тайнникъ Бо́жія благода́ти.

## Пѣ́снь 7.

**Ирмо́съ:** *Три́е о́троцы въ пе́щи, Тро́ицу прообрази́вше, преще́ние о́гненное попра́ша и, пою́ще, вопія́ху: благослове́нь еси́, Бо́же оте́ць на́шихъ.*

**О**тъ Тро́ицы Бо́га проповѣ́далъ еси́, чу́дне Нико́лае, тѣ́мже и по́чести отъ Него́ вѣ́нецъ прія́лъ еси́, блаже́нне, и ны́нѣ въ торже́ствѣ́ твоѣ́мъ усер́дно призы́вающихъ тя, не забу́ди на́съ, ра́бъ свои́хъ, но свѣ́ше назира́й, тя бо има́мы крѣ́пка моли́твенника.

**С**крижа́ль въ се́рдцы своѣ́мъ отъ младе́нства, о́тче Нико́лае, стяжа́въ дивныхъ добродѣ́телей, напи́санну безсме́ртнымъ пречи́стымъ пе́рстомъ

Христа́ Бо́га на́шего; моли́ Его́ о на́съ, во́ еже написанны́мъ на́мъ бы́ти въ кни́зѣ живо́тнѣй, святи́телю о́тче Нико́лае, досточу́дне.

**В**о святи́мъ рождествѣ́ твоёмъ, святи́телю о́тче, Бо́гомъ позна́нъ бы́лъ еси́ и Бо́га позна́лъ еси́, и вѣсь бы́сть Бо́жіе жили́ще, вѣсь яви́ся орга́нъ духо́вный, возглаша́ющъ вся́ку добродѣ́тель богодохнове́нныхъ пѣ́ній спасе́нія сказа́нія и добро́ту явля́я небе́снаго Ца́рствія, святи́телю Нико́лае.

**Богородиченъ:** **Съ** Бо́гомъ Засту́пницу Тя́ стяжа́хомъ, Ты́ бо Бо́жія Ма́ти бы́сть Творца́ и Содѣ́теля. И на́ше воображе́ніе прие́мша Всенепоро́чная, и сіе́ спаса́ша отъ тли́ и сме́рти и сла́вою божество́вненною просла́вляшаго.

## **Пѣснь 8.**

**Ирмо́съ:** *Ангельми немол́чно въ вы́шнихъ сла́вимаго Бо́га, небеса́ небе́сь, земля́, и го́ры, и хо́лми, и глубли́на, и вѣсь ро́дъ челове́ческій, пѣ́сньми Того́, я́ко Созда́теля и Изба́вителя, благослови́те и превозноси́те во вся́ вѣ́ки.*

**А**нгели дивя́тся, ви́дяще пресла́вная въ ча́съ рожде́нія твоего́, о́тче Нико́лае; челове́цы же ра́дуются, прие́млюще тя́ я́ко своего́ благоде́теля и къ Бо́гу моли́твенника неукло́нна, всѣ́мъ бо яви́лся еси́ ра́дость спасе́нія, милосе́рде Нико́лае.



**К**то не почудится или кто не прославитъ имене твоего, отче святителю, слыша на тебѣ выше закона естественнаго бывшая знаменія въ рождествѣ твоёмъ? И тѣмъ яви тя Господь свѣтильника всему міру; во святѣмъ же младенствѣ твоёмъ у матернихъ сосѣцъ показатя изрядна и искусна; тѣмъ войстинну воздержанію нелѣстный учитель явился еси, святителю Николѣе.

**В**торый Предтеча на земли явился еси на обличеніе беззаконія, отче Николѣе: овъ бо обличи Ирода беззаконновавшаго, ты же, отче, вся ереси далече отъ Цѣркве отгналъ еси и вся соблазны и беззаконія, яко хврастія, огнемъ ревности своея попалилъ еси, вѣрныхъ же утвердилъ еси, милосерде Николѣе.

**Богородичень:** Дивлюся, Святая Богоневѣсто, Владычице, таинству богорожденія Твоего: всѣхъ бо Содѣтель въ Тя вселися, и все человеческое естество на небеса вознесѣ; прибѣгающихъ подъ кровъ Твой пріими и спаси ны, Богоблагодатная Владычице.

## **Пѣснь 9.**

**Ирмосъ:** *Благословенъ Господь, Богъ Израилевъ, воздвигнувый рогъ спасенія намъ въ дому Давида, отрока Своего, милосердія ради*

милости, въ нѣхже поспѣи насъ Востокъ съ  
высоты и направилъ ны естъ на путь міра.

**Б**лагословѣнъ еси Боже о всѣхъ, яже твориши,  
идѣже бо хощеши, тамо побѣждается естества  
чинъ, якоже и нынѣ въ рождествѣ святителя  
Твоего выше закона естественнаго вѣрнымъ  
твоимъ дивная и пречудная явилъ еси; того  
молитвами, Христѣ, направи на путь міра.

**Б**лагословѣнна ты Богомъ, всѣмъ, отче  
Николаете, благослови убо и мене, поющаго святое  
рождество твое, и руками помощи простри, и  
приведи къ тихому пристанищу покаянія, яко да  
всегда славлю тя, отче Николаете.

**А**ще и много беззаконновахъ азъ окаянный, не  
отступаю надежды, покрова твоего, отче  
Николаете, всегда прибѣгаю и на тя надежду мою  
полагаю. Тѣмъ въ нынѣшнемъ настоящемъ  
торжествѣ, во святѣмъ твоѣмъ рождествѣ,  
радостно вопію ти: ты мя, отче, избави отъ  
всякія скорби, и бѣдъ, и печалей, елика бо  
хощеши и можеши.

**Б**лаженне и богоносе Николаете, виждь тѣсноту  
души моея, како врагъ мой подвиже на мя  
брань на всякъ день и не можетъ истощити тула  
стрѣлъ своихъ, но присно ураняетъ мя и почити  
ми не даетъ. Азъ же изнемогахъ, но ты, отче,  
сокруши козни его молитвами своими, яко да

пріёмъ по́мощь твою́ святу́ю, непреста́нно  
сла́влю тя́.

**Богоро́диченъ:** Ни́ктоже при́бѣга́й подѣ  
кро́вь надѣ́жды Твоея́, Пресвята́я Богоневѣ́сто,  
тощѣ́ исхо́дитъ, но вся́къ прося́й пріе́млетъ  
ско́рую Твою́ по́мощь, ю́же и мнѣ́ пода́ждь,  
Отрокови́це, пою́щему пресвято́е Твое́  
Рождество́.

### **Свѣ́тиленъ:**

**В**оистину́ шлѣ́мъ и ору́жіе на ді́авола  
непобѣ́димое, ты́ еси́, о́тче Ни́ко́лае, отъ Бо́га  
явле́нь еси́. Христі́аномъ же помо́женіе и  
утвержде́ніе, іера́рхомъ удобре́ніе, въ бѣ́дахъ же  
притека́ющимъ къ тебѣ́ ско́рая по́мощь и  
заступле́ніе, святи́телю Госпо́день. **[Два́жды.]**

### **Сла́ва, и ны́нѣ:**

**О**блаче́ превы́шшій небе́сь, ра́дуйся,  
иска́пающій на́мъ ка́плю душе́спасительную,  
Богоро́дице; Ты́, Всеблага́я, пода́ждь отъ Бо́га  
царе́мъ на́шимъ побѣ́ды на враги́, и междоусо́бія  
бу́рю утиши́, елика́ бо хо́щеши, вся́ мо́жеши, я́ко  
Ма́ти Госпо́дня.

**На хвали́техъ стихи́ры на 4, гла́съ 4.**

**Подобѣ́нь:** Да́ль еси́ зна́меніе.

**Д**а́ръ благопрі́ятенъ, отъ родите́льных ру́къ  
Бо́гу возложе́нный, и отъ Него́ усво́енный, и на

по́льзу вѣ́рнымъ пода́нный, святи́телю Нико́лае, тѣ́мже въ тебѣ́ упоко́йся, благода́ть Пресвята́го Ду́ха, сла́вне, беззло́біемъ возрасти́вши тя и му́дростию украси́вши. **[Два́жды.]**

**Д**не́сь па́мять рождества́ твоего́, святи́телю о́тче Нико́лае, я́ко со́лнце на́мъ богоно́сно возсія́ лучи́ богаты́хъ дарова́ній, просвѣ́щаючи чту́щихъ тя и вѣ́рою блажа́щихъ, мгло́ же лю́тыхъ отгона́ючи, и проше́нія вѣ́рнымъ исполня́ючи, тѣ́мъ тя, досточу́дне, почита́емъ.

**Б**ожѣ́ственную благода́ть отъ Бо́га при́ялъ еси́, святи́телю Нико́лае, ю́же прие́мъ свѣ́ше, и на́съ назира́й, праждну́ющихъ лю́бовію честное́ твое́ рождество́, и пода́ждь отъ Бо́га це́рква́мъ единомы́сліе, и ца́ремъ на́шимъ побѣ́ды на враги́, и мі́ру умире́ние, и земли́ на́шей благопло́діе, и душа́мъ на́шимъ ве́лію ми́лость.

### **Сла́ва, гласъ 2:**

**О**тъ ко́рене блага́го благі́й прозябе́ пло́дъ, и́же отъ младе́нчества освяще́нный, и яко́же Самуи́ль въ да́ръ Бо́гу возложе́нный, о́тче святи́телю Нико́лае, Бо́жіею бо благода́тію па́че, не́жели млеко́мъ воспита́нный, тѣ́мъ и на го́ру добродѣ́телей взы́де, преочи́щенну ду́шу стяжа́въ, и ра́зумъ имѣ́я при́сно къ Бо́гу, небе́сное бы́сть жили́ще Ду́ха, Христо́ва оби́тель

явѣся. Того́, блаже́нне, моли́ о на́съ, е́же спасти́ся душа́мъ на́шимъ.

**И нынѣ, богородиченъ, гласъ тойже:**

**Я**ко плодови́та маслина, Дѣ́ва [израсти Тебе́, Пло́да Животна́го, плодоно́сити мі́рови ве́лю и богату́ю ми́лость].

**Та́же славосло́віе вели́кое, [екте́ніи] и отпу́сть.**

## **НА ЛИТУРГІИ**

**Блаже́нна, Апосто́ль, Ева́нгеліе и прича́стенъ все́ святі́тельское: [Блаже́нна, отъ канона́ пѣ́снь 3 и 6.**

**Проки́менъ, гласъ 1:** Уста́ моя́ возглаго́луютъ премудро́сть,\* и поуче́ніе се́рдца моего́ ра́зумъ.

**Стихъ:** Услы́шите сі́я вси́ язы́цы, внуші́те вси́ живу́щии по все́леннѣй.

**Апосто́ль ко Евре́омъ, зача́ло 318.**

**Аллилу́ія, гласъ 2:** Уста́ пра́веднаго поуча́тся премудро́сти, и язы́къ его́ возглаго́летъ су́дь.

**Стихъ:** Зако́нъ Бо́га его́ въ се́рдцѣ́ его́, и не за́пнутся стопы́ его́.

**Ева́нгеліе Іоа́нна, зача́ло 36.**



**Прича́стенъ:** Въ па́мь вѣ́чную бу́детъ пра́ведникъ, отъ слѹ́ха зла́ не убой́тся].

**Примѣчанія:**

[1] По списку Вятскаго каѳедральнаго собора начала XVIII в. (Собрание Библиотеки Россійской Академіи наукъ въ г. С.-Петербургѣ, Вятское собраніе № 66.)

[2] Въ текстѣ ошибочно «гласъ 2» (См. Ирмологій).

[3] Въ текстѣ ошиб. «гласъ 2».

**Источникъ:** С. Черкасова. Русскія службы Рождеству святителя Николая (Окончаніе). // Журналъ «Альфа и Омега». М., 2008. № 2 (52).

